

本朝分省人物考

人物考卷之七十七目錄

湖廣承天府

胡美

張倫

歐陽謙

李廷琛

姚名善

陳勛

李慶

劉鈺

劉洪

孫交

魯鐸

沈文華

裴椿

童承敘

初杲

夏寵

商大節

唐奉先

錢 鎔

高 岱

陳 栢

補遺

李宗信

朱 敏

湖廣襄陽府

任亨泰

廖 昇

艾 福

韓邦問

李 端

張 纁

劉存義

王 琰

曹璘

湖廣鄖陽府

周清

朱哀

溫如玉

本朝分省人物考卷之七十七

湖廣承天府

胡美

胡美漢沔人初名廷瑞至正間仕陳友諒爲江西行省丞相守南昌高皇帝率師征友諒直擣九江友諒走南昌時兵威震疊胡美遣使納款上至南昌美迎謁上撫勞之仍故官從平武昌克海安克高郵進圍蘇州執張士誠爲征南將軍率安吉寧國等衛軍由江西取福建降其首將進中書平章兼同知詹事院事尋以督兵克建寧興化等郡執元將陳子

琦福建悉平統兵守禦 上幸汴召還扈從洪武三年封豫章侯食祿千五百石賜鐵券改封臨淮侯二十六年卒

張倫

張倫字伯叙京山人洪武初舉明經行修以母老亂歸再舉孝廉授本縣訓導敦訓有範勤于訓迪子從道字質德洪武中舉人授廬州通判時以清慎聞上賜羊酒爲勞永樂初擢知徽州誅豪猾郡中清淨憂起調永平興學校年饑發賑不待報虜入從間道追之斬獲甚衆虜遁去遼山東按察使

歐陽謙

歐陽謙字伯益沔陽人洪武中舉明經授耀州學正擢御史永樂初谷庶人叛命謙密察之謙野服具舟隨賈人之長沙具得庶人秘謀歸報遂討其罪以功改編修轉考功郎中優於文學所著有滄浪集

李廷琛

李廷琛一名深景陵人國初從取江南晉陵攻雲州援龍灣佐平饒州征蘄黃下豫章鏖戰彭蠡甲辰定武昌江陵從克襄陽安陸等處以屢官擢授景陵衛指揮副使鄧愈以湖廣行省平章出鎮襄陽廷琛屬

焉嚴號令練軍武繕甲兵修屯田西禦王保保兵遇  
征討則備前驅洪武元年四月 上勅諭鄧愈統領  
襄陽景陵衛官軍前去征取河南迤北未附城池其  
景陵衛軍馬屬廷琛統領叅隨征進先是三月愈命  
廷琛同指揮王成等率師取唐州又取南陽至是奉  
旨卽命廷琛同指揮吳復等攻取南陽各屬克之  
九月擊老馬營劉寨斬關而入擒殺其衆是年冬從  
討蜀河于是金商均房諸州悉平三年西擊王保保  
營五年從討澧州等處溪洞蠻夷皆與有功累官都  
督同知



姚名善

姚名善字克修洪武十八年以歲薦授監察御史永樂間建都燕京漕糧未通名善首倡議疏河開運遂命協同平江伯陳瑄相地度勢築壩引泉及諸閘啟閉籌畫之功居多功成詔進五品服色加俸級及卒配食平江伯祠

陳勛

陳勛字功懋沔人賦性英敏少與其弟勉同業尚書孝友天性雖童子時如成人年二十四舉永樂庚子鄉試屢試於南宮不第北遊成均所交多海內名俊

後謁選於吏部試第一授本部司務長身玉立雙眸炯炯尤善談論能詩文一時卿輔如楊文定溥劉文安定之皆折節下之雅善倫鑒裨於用舍以九載考績擢青州府知府青州在海濱地瘠而民悍乃加意拊循教民孝弟力田每行縣省耕繪爲勸農圖又興學造士文行丕振未幾患足疾乞骸骨歸與其弟飲酒賦詩優游林下者二十餘年歲饑則發粟以賑宗族鄉黨皆賴之年七十三終

李慶

李慶字積善景陵人弱冠補邑庠弟子員讀書綴文

竟日不越戶限以久次升南雍正統九年擢建昌府同知同官督民賦者慮愆期爲已累每歲十月輒期會嚴急民以爲病慶嘆曰十月江南收穫時也奈何遽責其輸賦乃下令寬之民大喜輸者縻至罔敢後外艱服闋改南京戶部郎中南都糧餉自兩浙輸者十之六同官以浙多巨室凡朱墨楮筆徧禱之屬皆責輸者供之慶旣眎事一切罷之輸者歡呼祝誦而去內艱服闋改南京禮部郎中南畿諸郡歲進表箋例送禮部轉以上聞奸吏需求百端或指撻點畫之訛以求賂慶悉禁絕吏縮手不敢動陞浙江都轉

運鹽使司兩浙鹽利爲它運司用巨商豪賈投券者踵相躡于庭前此爲運使者交通商賈富及僕隸慶至官嚴簿書時出納絕請謁有持券請鹽者按歲月先後給之權貴請託皆謝絕不顧在官二年歲課三倍它使天順七年春致仕歸至姑蘇疾作卒於舟與人交久而益篤聞其喪則皆爲位哭之其居官廉俸祿所入多以贖宗族故舊之貧者日用不給則貰貸以繼之其爲運使布衣蔬食處之澹然或譏其身處脂膏不能自潤慶清介自若也歷官幾二十年所居第宅茅屋數椽田園不增尺寸歿之日妻子至無以

爲喪

劉 鈺

劉鈺字世美沔陽人父弦隸戎天津生鈺成化丙戌進士改翰林庶吉士授戶部主事嘗督糧九江防檢甚嚴羨餘悉貯府庫尋守常州廉明勤慎吏民敬憚豪右犯法至自經不敢見母喪幾無以爲殮服除改守揚州未幾父卒鈺感疾亦卒鈺剛介自持所歷嚴肅歸自常州民有追送二瓜者剖之乃金百餘急還而遣之毘陵至今祠祀焉性孝愛母之官必奉親以行且挈雙棺自隨人稱孝廉云

劉洪

劉洪字希範鍾祥縣人成化戊戌進士已亥令山東陽穀邑事修舉擢雲南道監察御史嘗巡兩浙鹽剔蠹刊穢國課充足弘治戊申按雲南劾叅使大臣不法者官吏望風震縮時監試場屋取士得人鈐制益養悍夷不敢橫庚戌詔修祧廟命董其役告成賜白金文綺在道幾七載鵬騫隼擊風裁凜然壬子擢浙江按察司副使發奸擿伏恩威並著凡毀菴寺立鄉塾建分司闢險隘俾民知嚮方者事事畢舉戊午擢廣東按察使釐革諸司積垢及處海舶番人治

徃徃切中時病遠近快之壬戌七月陞右僉都御史  
巡撫貴州先是貴州女苗米魯祐福煽亂一方聲勢  
孔熾司徒王軾嘗督師征勦雖元惡就戮而支黨竄  
逸尚阻險拒命人心惶駭洪至首追劾先時守臣邀  
功啟釁之罪削奪恩廕遂練兵誓衆檄宣慰使貴榮  
父子指授方略協力効命草薶而禽獮之一境始平  
功上 孝廟賜勅褒獎甲子四川松茂番夷復肆亂  
上以洪久諳戎務復改蒞巡撫 賜璽書俾專征討  
乃建戰守二策申嚴號令躬率諸路軍馬捕勦且宣  
布 朝廷德意示以福禍散撫其衆由是列柯空籠

叅遊將領及兵備官僚每歲一交會以籌畫邊計勞績雄偉 孝廟復賜勅獎諭 武宗登極進擢右副都御史又奏改松藩疊茂河道以絕番人出沒之患開東路以平物價復舊制以據形勝查土軍以治番夷修關堡以固扞禦肅綱紀以戢奸慝定體式以協戎事重儲峙以實邊用恤舍餘以防戰守九事及查理站丁疏通鈔法革冗食禁妄費諸務咸中肯綮在蜀一年丁外艱歸戊辰服闋上京師時逆瑾用事以洪平日杭已思欲中傷之乃捃摭瑣細罰米二百輸



松藩洪不少屈瑾誅擢右都御史總督兩廣軍務得便宜從事值時勢艱危洪朝謀夕慮惟安輯是圖不遑啓處惠潮二郡河源龍川興寧程鄉等四縣東接七閩北隣豫章山嶺聯亘道路嶮巇盜賊竊發民無寧歲而賊首若林貴謝祥輩聚兇醜恒至萬餘攻劫焚擄慘不忍言人甚苦之洪訓兵積儲百需咸備卽督率郡師兼調狼兵合數萬餘勵氣奮勇直抵巢穴甫兩月俘斬八千人追回被擄男婦一百五十餘口奪獲資蓄器械無算諸克盡戮餘黨悉平捷聞上賜勅獎兼白金文綺廣韶合郡挂額賊構逆復調狼

兵及軍二萬捕誅無孑遺

上復有白金文綺之賜

劉暢

庚午再議削平府江蠻寇之策方擬入奏而改柄南臺之命下矣始逆瑾擅權言路壅塞洪力振風紀直氣復伸往時臺獄多爲權貴沮撓悉論以法不少徇避淮揚流賊充斥揚言欲趨犯應天等處洪倡建大議俾分兵據險以遏其衝且謂長江不可恃責操江都御史以慎固封守之義因疏論黜陟武臣賢否如文臣例以求將材而責實効尤切時宜辛未丁繼母戊春服闋洪以衰老漸逼不出築室於所居石

在于寓言陳言貯書之說自號石坡陳人貯

書萬卷以自娛教子樂道飲酒賦詩陶然也乙亥二月以疾終壽六十九

### 孫 交

孫交字志同鍾祥縣人自幼秀穎嗜學雖盛暑不輟成化辛丑第進士授南京兵部主事留務事簡每日散衙後諸僚輩各歸私第或出訪客或控朋儕飲奕賦詩習以爲常交獨退處一室默坐觀書至晚方回或以爲言則曰對聖賢語不猶愈對賓客妻妾乎三原王端毅公時爲太司馬嘉其有志甚愛之弘治初三原起爲冢宰卽調吏部用以自輔歷稽勲文選司

員外郎進驗封司郎中七年以憂去十年起復補稽  
勲司十六年調文選司郎中守法信度確然不撓徧  
三要司十有餘年益勵廉隅惟培植善類不忍其摧  
抑一切選授陞遷與倪文毅公斟酌地方遠近煩簡  
務當其才輿論胥服十四年陞太常寺少卿提督四  
夷館正德元年陞光祿寺卿時逆瑾竊政諸所作無  
益事耗民財有如木蠹交不激不隨臨機節縮省費  
不貲雖諸權貴亦安之三年陞戶部右侍郎尋改吏  
部五年調南京吏部本年陞南京吏部尚書未任六  
年陞戶部尚書時畿甸河朔流賊劉六劉七等鴟張

爲中原患 朝廷命將征討調度甚急四方以災上  
不得不覆某處蠲稅糧若干其處截留運粟若干與  
師四萬之儲不得時繼事皆難處交從容調停權其  
輕重緩急務濟事不務近名又因民貧歛急不忍椎  
肌竭髓取償歲額而至於官爵之冒濫賜與之無節  
并時之宴遊無益之齋醮一切侈靡耗財之事終不  
能違其所蔽因其所明乃歎曰胡爲使我民至此極  
也于八年乞休歸隱九峯受知 世廟于潛邸入繼  
大統起耆宿再入爲司徒以輔成新正爲國當怨必  
效杜利孔清利源還殷阜之舊國命民命身任不疑

嘉靖二年以老請歸四年卒於家贈少保謚榮僖平生言論恂恂誠慤無大臣氣岸其清慎雅恬始終一致云

### 魯鐸

魯鐸字振之景陵人成化丙午領鄉薦弘治壬戌舉禮部第一改翰林庶吉士少師李東陽雅重之授編修預修孝宗實錄武宗卽位詔諭安南鐸克正使賜一品服以行比至宣布威德正其儀禮諸所餽遺悉却之遷國子司業進南京祭酒尋改北京鐸屢歷成均其教主於理道不事章句南北士多所造就

尤持清操前宿弊縉紳仰之謝病歸屏迹爲投老計  
嘉靖初刑部尚書林俊上書謂經師易得人師難求  
鐸性質渾樸志尚清純道足以鎮雅黜浮學足以廉  
頑立懦方今釐革庶弊正育賢成德振作士風之時  
臺諫交章論薦推卿佐者五未得俞 旨年六十七  
卒賜謚文恪鐸家居以身率物嘗作俗言以勸鄉人  
有巨盜起掠民牛馬或給爲鐸物必釋之其感人如  
此所著已有園諸藁若干卷藏于家

### 沈文華

沈文華字崇實鍾祥人賦質英瑩聰穎絕世爲弟子

員時巡撫韓某嘗延之以教其子欲分給屯田百畝  
資貧文華力辭之人已服其雅操迨弘治乙卯湖廣  
鄉薦第二人丙辰登進士已未授刑部主事上疏直  
學士程敏政主考之寃壬戌陞員外郎總管本科掌  
三法司事奏多平反京師爲之語曰且莫忙事須問  
沈郎歷官陝西提學副使嚴立科條振作士氣八郡  
之風滂然以變尋以忤權貴左遷浙江叅議遂謝政  
歸隱龍化山足跡不履公府嘗捐資以廣學宮繼毫  
無費於有司至今學士大夫甚德之自撰廣學宮記  
以紀其事



裴椿

裴椿字永祥鍾祥人幼穎敏英發志趣高遠績學攻  
文不悅纖麗爲弟子員時考次當收廩椿義讓於謝  
生曰此生貧乏年且過予於是督學者加其行特優  
獎之正德丙子以易薦鄉書授丹徒教諭尋調常洲  
嚴矩範課行業士人多所造就嘉靖壬午典順天鄉  
試乙酉廣東主試擢南京戶部主事督理京儲會計  
允當丁酉擢晉郎中以扈蹕陪祀賚予銀幣有差戊  
戌出守延平府恤民隱解宿弊公明正直節儉仁愛  
平反冤獄多賴全活後士民感慕舉祠名宦至今卅

上稱先輩典刑者必歸焉

### 童承敘

童承敘字士疇其先隨州人元季始祖避兵居沔陽遂爲沔陽人承敘方童時卽解聲律諳詞章十餘歲通經史百家言登正德辛巳進士改翰林院庶吉士嘉靖壬午授編修乙酉以父中憲憂倚廬哀毀遂致暈病服闋買舟至清源聞大獄起且念兄承德鰥處輒嘆曰此尚可逐逐狗祿仕哉牽帆而返未幾承德死矣人咸服承敘之爲智且孝壬辰北上充經筵官甲午充講官時上御文華殿承敘進講周書立

政篇極陳王業艱難周公夾輔之忠詞意婉切  
改容聽焉乙未充會試同考官尋陞中允丙申以歷  
朝訓錄成陞司經局洗馬仍理司業事承敘爲司業  
嘗疏明監規五事飭學政六事上之皆鑒鑒可紀祭  
酒呂柟以推明正學爲已任乃計樂律興典禮崇先  
王之化承敘之志咸與協合柟喜曰天作之合吾教  
其有興乎已亥 上因正冊儲位乃進左庶子兼翰  
林院侍講庚子奉命主順天鄉試撤棘之日人咸以  
得士稱權貴子弟被黜者或構之承敘弗理久之恬  
如也壬寅以省墓假歸未幾卒 上賜諭祭

初杲

初杲字啟昭潛江人正德辛巳進士授四川道監察御史會議大禮引經抗說同百官赴文華門哭聲徹內世宗震怒宣諭廷杖幾斃後手疏劾都御史席書不當驟轉禮部尚書儉邪側目是歲冬奉旨巡視山西河東等處鹽法濬河渠築堤堰饑政大舉商民便之共立衛民祠以祀焉尋轉河南僉事分巡睢陳擒滅流賊王長子洪輔等數萬人河洛士民歡騰陞雲南按察司副使撫綏懷寧民夷戴惠轉雲南叅政奉表入賀遂上疏乞休歸田十有九年卒

夏寵

夏寵字時承京山人幼有神解讀書五行俱下綜博淹通議論卓邁正德間麻城賊攻其家父昌捍之力屈呼寵並逃時寵母未葬不去遂衰服守柩賊義之獨免于難後舉鄉試

商大節

商大節字孟堅號少峯承天人正德癸酉以春秋中湖廣鄉試再上春官不第遂領教洛陽讀書篤行以身先士六年而教成嘉靖元年應山東主考之聘癸未成進士出令豐城召補兵科給事中風裁峻整不

避權貴七年奉命主試雲貴八年勘事江右嘉靖十六年起復以例降鹽城縣丞尋遷國子監丞歷刑部郎中十九年陞廣東僉事整飭高肇等處地方進山東叅議歷官右僉都御史巡撫保定贊理軍務兼提督紫荆等關選將練兵以戒不虞庚戌夏召入內臺八月虜大舉薄京師甚急奉 上命巡視九門是時逆鸞以節急殺亂賊之語意有所指銜之入骨蓋鸞嘗陰遣家丁時義潛入虜營勾引入寇庚戌之變鸞獨引兵入援 上予錫駢繁寵眷獨渥已又冒總京營之命怙寵作威公卿至有不敢仰視者節義形於

色獨不爲下已奉命經畧京城內外招募義勇四千人別爲一軍訓練鼓舞軍聲大振鸞益忌之乃奏命節畫地分守而以離城二十里之內爲節信地蓋欲以是弑之也節憤然曰不發其奸而死於逆人之手無名遂抗疏數其罪忤旨下獄麾下將領數百人相率詣闕懇寬請以身代無何華人自虜逃回者言逆鸞勾引亂華之秘鸞知禍在旦夕乃忿恚疽發背死竟以勾虜剗屍赤族上於是憐節忠義將釋之乃遽卒於獄平生忼慨負奇氣忠信孝友得之天性而問學則以砥礪名節忠義爲本遇事英發不肯以天

下第一等事讓他人故自其作教作縣司諫刑敝歷  
藩臬巡撫畿甸總憲內臺風裁勲譽卓然獨出于人  
表云

唐奉先

唐奉先京山人以進士爲監察御史父本忠坐事繫  
獄奉先上書願代父刑 上震怒欲連坐已而感悟  
爲貸其父改奉先爲都督府經歷

錢 鎔

錢鎔字鳴叔顯陵衛人生絕穎異讀書一過目不忘  
年二十六中嘉靖己酉鄉試庚戌登進士第出知江



陰錞性剛果遇事敢爲時倭夷亂浙東朝廷置督撫大臣鎮之錞以浙直脣齒地彼有備賊必西向亟請繕城待之明年城成而賊果犯蘇松又明年賊掠江陰錞遣兵逆之斜橋三戰却之賊不敢偪城退營於定山會歲侵江陰羣盜亦起錞恐其翼賊稍招輯之誅其魁而解散其餘黨是年冬賊據柘林明年乙卯春賊自柘林入三丈浦騰陸疾趨青陽鎮已賊艘在三丈浦者爲叅政任環所燔乃奪民艘南趨無錫攻無錫城不克又還趨江陰錞禦之於石撞矢盡繼以瓦石錞被創猶鬪賊遂遁去錞策賊意未滿當復

來預營華墅而陣賊果復來官兵斬首九級相距久之死傷畧相當乃更合常熟賊三千人析其半寇靖江而餘航蔡涇入偪城錚業領檄援靖江得報亟還江陰賊已度大橋明日攻城城守固賊移營蔡涇距城九里焚掠四野烟燄蔽天錚從城上望之嚙指誓曰剪屠烈矣奈何與此賊俱生耶乃騎而出背城決死戰時狼兵與所募甲士僅千人先是狼兵驕錚素折之至是乘其薄賊故望風潰走錚自督其所從卒兵廷錚墜馬復躍而上賊戟之下死焉年三十一巡御史周如斗上其事於朝詔贈錚光祿少卿蔭一

子錦衣衛百戶立祠江上歲以春秋祀

高岱

高岱字伯宗京山人嘉靖庚戌進士歷刑部郎中衣敝垢同舍郎多誚之岱自若也會主事董傳策張翀給事中吳時來疏分宜父子不法狀詔逮繫獄將寘重典岱請大司寇鄭曉輕之獄上戍邊岱復爲資裝微服送之出郊門分宜父子聞而銜之莫可爲地會景王封諷銓曹出爲長史岱好讀先秦古文爲唐人詩多論著性戇好面折人過失復以仕淹浮湛王門無所建白卒著鴻猷錄樵論楚漢餘談弟啓嘉靖丙

辰進士密鄉薦皆有才名

陳栢

陳栢字憲卿別號蘇山沔陽人童時沔守李川甫奇之至携之署夫人加盥沐焉而勞之酒食曰才固不乏州得童士疇乃又得陳生何易也及舉於鄉游太學益肆其力於古文詞交游日益進困公車者二十有二年而始成進士授兵部職方主事一再徙而長職方遷按察副使飭井陘兵備卓有聲忌者爲流言中之竟坐調遂不出最後厭一切世法而始極意於金石竹素之業世亦麴趣而悅之長歌短吟若順風

以呼碑板卷軸不脛而馳四裔自湖以南亡不知有  
蘇山先生者所著有江閣來青軒詩文選借山亭前  
集續集退樂軒詩選職方奏稿大業堂尺牘沔陽人  
物考數十百卷行於世

補遺

李宗信

李宗信承天府潛江人洪武監生授監察御史改大  
理評事出知保寧府躬均賦役驗丁覆實民賴之銓  
司奏績上曰李宗信能臣也不在考列永樂間擢  
交趾按察使忠義滋著吏民畏服乞歸賜以鈔俸

朱敏

朱敏承天府荆門人洪武壬午舉人永樂間拜御史  
風采凝重囊無贏餘嘗被抄沒惟敝衣一襲以是知  
其廉正卒于官歸葬命沿途有司祭奠

湖廣襄陽府

任亨泰

任亨泰襄陽縣人由歲貢入太學洪武十八年殿試  
擢亨泰第一授翰林院修撰二十五年改詹事院爲  
府尋陞亨泰少詹事仍兼修撰二十七年癸亥上  
重其學行擢禮部尚書時青州日照民江伯兒以母  
病割股肉食之不愈乃禱於岱嶽祠誓云母病愈則  
殺子以祀旣而母病愈竟殺其三歲子祭有司以聞  
上怒曰父子人倫至重禮父爲長子三年服今百姓  
無識殺其子絕滅倫理宜亟捕治之勿使傷壞風化

遂逮伯兒杖一百謫戍海南因命禮部定議旌表孝  
行事例行於天下凡割肝臥冰之事第聽其所爲不  
在旌表之例又詔國子博士錢宰等至上語正定  
蔡氏書傳且曰爾等知天象乎皆對以不知上曰  
朕觀天象自洪武初有黑氣凝于奎壁乃文章之府  
朕甚異焉今年春暮其間黑氣始消文運當興爾等  
宜考古證今有所述作以稱朕意於是命翰林院學  
士劉三吾等總其事開局翰林院正定是書時禮待  
諸儒甚厚各賜以綺繒衣被等物二十八年三月秦  
王槩薨詔定喪禮亨泰奏以考之喪制宜輟朝五日



今遇時享宜暫輟朝一日服制與魯王同從之九月  
庚戌頒祖訓條章於內外文武諸司十月辛卯朔享  
泰奏百官朝參賜食實出厚恩緣職事衆多供億爲  
難請罷賜從之十一月出使安南款諭國王日焜以  
中朝狀元又享泰議論英發敬之盡禮至二十九年  
春二月使還上聞其在安南私市蠻人降爲監察  
御史後以事免歸

廖昇

廖昇襄陽人以學行名與方孝孺王紳輩友善洪武  
中爲左府斷事太祖知其賢擢太常少卿建文元

年正月勅修高廟實錄昇與侍講學士高異志副總裁昇博雅有史才明達負氣書靖難兵事語多撫實聞茹瑺等龍潭還慟哭與家人訣自經死

艾福

艾福字天錫襄陽人天順四年進士授監察御史成化初巡按山西考覈官庶黜不職者九十人旌其能者七人審錄重辟有童年十三分盜贓米一釜憐其幼特請釋之三年按浙江以父喪歸八年擢光祿寺少卿陞正卿凡典御膳及諸供應皆區畫有定上疏請省異教供餼坐繫詔獄奪俸六月十九年擢禮部

右侍郎仍掌寺事累上疏乞休始命致仕家居八年卒年七十三訃聞賜祭葬如例福爲人通儻習於世故晚在光祿爲近侍所侮累乞退避竟遂其志以去人以是多之

韓邦問

韓邦問字大經浙江人以父任襄府長史因家襄陽成化己丑進士歷大理寺正補淮安知府歷官刑部尚書廉謹縝密未嘗輕出一言所在盡職後歸休於浙尋會稽蘭亭故事與尚書王鑑之爲真率會卒

李端

李端字表正宜城人成化辛丑進士拜南道監察御史剛毅不撓屢忤權貴中官汪直憾之逮繫詔獄謫永寧安撫經歷遷温州知府

張 纁

張纁字朝儀均州人弘治己未進士知原武縣召爲監察御史清修耿介與世寡諧有古名士風

劉存義

劉存義襄陽人號漢樓登嘉靖丙辰進士筮仕平湖正值倭夷猖獗邑故無城存義未任時署印殷節推已相土興工矣甫下車悉心料理以完前工而倭從

乍浦直抵當湖督臣撫臣一時駐劄邑中諸事倚辦  
又親自率兵督戰立射死數人倭氣稍却退往他所  
後又同督撫胡公以計款首惡徐海潛出其不意將  
諸倭數百人盡焚滅于沈庄地方藉以安堵選入西  
臺論列關天下大計遷大理丞以病請告歸未踰年  
而卒

補遺

王 琰

王琰字良璧湖廣棗陽縣人成化十一年進士由行  
人選廣東道御史巡按淮楊真定建言廷杖卒

曹 璘

曹璘字廷輝湖廣襄陽縣人成化十四年進士由行人選江西道御史弘治元年建言下獄復職巡按兩廣三年疏請致仕

湖廣鄖陽府

周清

周清鄖陽人正德辛未進士清操不樂仕進隱居元和觀隱真洞中教授生徒嘉靖初以父命出授浙江處州府推官以賢能應徵卒于途居鄉有改運竹山之功鄉人至今德之

朱哀

朱哀鄖西人嘉靖丁酉領鄉薦歷官知揚州府同知值倭寇掠海壩哀率兵征之力戰死於陣事聞贈布政司叅議蔭其子立祠祀焉

溫如玉

溫如玉鄖縣人嘉靖癸丑進士除行人拜監察御史  
巡漕浙江復巡按蘇松所在綽著風稔時江南當島  
寇初平之後物產凋耗如玉壹意汰墨鋤強以拊循  
其民四郡風被甦息是 嘉靖司副使以病歸  
卒如玉平生謹廉平 卒後考入居鄉不以氣勢  
加人居顯官二十年故廬不增飾一 林頌之



人物考卷之七十八目錄

湖廣德安府

王興福

王鏞

陳壽

姚善

童寅

袁瓚

李言

孟

陳金

劉洪

嚴禎

饒鳳翔

華清

王琰

周憲

陳軾

徐珪

劉槩

顏木

向光振

高翀

傅鳳翔

余胤緒

何遷

吳翰詞

補遺

樊士信

程春震

湖廣黃州府

薛均

康茂才

吳山

戴綸

劉從政

吳琳

楊節

蕭昇

鄒來學

呂鏞

劉訓

梅芳

趙說

潘文浩

熊經

舒崑山

李汰

王麟

華巒

董朴

李文祥

周廷徵

劉璫

曾大有

陳言

劉天和

邢寰

石金

陳伯安

賈啟

劉淑相

王澄

蕭一中

毛鳳韶

張珪

劉采

張明道

胡明庶

胡明通

馮天馭

范芝

奚世亮

蔡完

耿定向

黃卷

王一鳴

陳文

洪祥

史玉明

李掾

補遺

丁普郎

賈啓

王廷陳

喻希禮

本朝分省人物考卷之七十八

湖廣德安府

王興福

王興福隨州人元至正丙午太祖命興福守徽有善政遷知杭州時杭初附人心恟恟未安興福明於大體撫輯多方寬簡不苛大慰民望吳元年四月不雨至六月興福致禱立應歲獲有年洪武二年肇建山川壇于鳳凰山麓裡祀中節秩滿召還父老遮留興福慰諭遣之曰予匪能惠爾乃爾能奉法遵約束爾上聞而嘉之陟吏部尚書三年坐事左遷西安

知府

王鏞

王鏞隨州人洪武初以才能薦授鎮江府通判五年擢知嘉興府政績卓異入爲戶部侍郎尋復出知嘉興久之免歸

陳壽

陳壽隨州人洪武三十一年舉於鄉拜監察御史出補山東叅議召入爲工部侍郎永樂初漢庶人謀奪嫡譖官寮諸臣楊溥王愷等及壽壽下獄十餘年而卒仁宗登極贈工部尚書子璫亦有才名官歷戶

部侍郎

姚善

姚善字克一湖廣安陸人洪武中鄉舉爲諸生時扁讀書所曰待旦軒歷祁門丞同知廬州重慶擢知蘇州府洞達政體張弛寬密允協時宜數造請郡賢考求治道因俗救正吏民嚮化治行爲列郡最隱士王賓居於陋巷善往候舍車詣門賓問爲誰曰姚善賓乃開門延語及賓報謁面府門再拜而返又將候韓奭奭避入太湖錢芹自守甚高願見不得有俞貞木者以明經見重月朔望必延致學宮講書訓士一日



饋米於貞木誤送芹所芹受之吏覺其誤詣貞木以告貞木曰錢先生不苟取與今受不辭必仰府公之賢耳善聞欲往候使人先道意芹曰芹誠願見然芹民也若明公弘下士之風請俟月朔會於學宮如期至迎芹置上坐請質經義芹曰此士子之業公今有官守何不詢以時務而尚事此帖括乎善益起敬請問今日急務芹出授一簡竟不交一言而出視之皆戰守制勝之策時靖難兵已出北平善於是密結常鎮嘉松四郡守訓練民兵相約勤王而薦芹爲行軍司馬建文元年善至京師畫策防禦又從大將軍北

行尋還京建文君用漢破七國策貶齊黃於外善言  
於朝曰人有文武才畧可扶顛濟危者反置散地不  
用今事已狼狽須急召之詢其姓名不對再三詢之  
曰今人才豈有過於黃大卿者遂復召還二人建文  
四年詔善督五郡兵勤王未及戰 文皇卽位索子  
澄急子澄避善所約共航海善謝曰公可去善不可  
去公朝臣四往號召圖興復善職守土義當與城存  
亡子澄遂去善爲麾下縛見 文皇詰曰若一郡守  
敢舉兵抗我邪厲聲不遜死

童 寅

童寅字以敬隨州人永樂甲辰進士授監察御史出按蘇松以及滇南遼東諸郡風裁肅然補交趾按察使以母喪歸復除江西按察使廉介勤恪存心寬恕推明至公獄無冤滯既卒吏民哀悼護喪歸家無贏帛不能庇及其孥云

### 張 瓚

張瓚字宗器孝感人正統丁卯鄉試明年第進士拜一部虞衡司主事甚有聲稱從石尚書璞督餉山西河南又從趙侍郎仁塞決河於山東沙灣裨益甚多二公才之湖廣白糧稅非土產爲患甚大奏移於蘇

松鄉民至今賴之遷郎中會京畿民饑奉賑之而民  
大悅天順庚辰知太原府僅期月以憂去服闋改浙  
之寧波首定徭役法每十年而一變第其等有差於  
民甚便監市舶中官福住怙勢黷貨民罔堪命乃疏  
其罪而福住爲之奪氣反中以計章下監司事得白  
而福住亦僅免其黨俱伏法成化丙戌遷廣東叅政  
專總糧儲積弊久不能除請勅命軍衛有司悉聽  
裁處由是不律者始得繩之以法詔天下總糧者  
以此爲例六年遷浙江左布政使凡百利病悉興革  
之士民胥服甲午遷右副都御史巡撫四川首條禁

約數十事榜於通衢切中民隱播州大壩灣溪等所  
自正統中征之未服分遣宣慰使楊輝進攻斬首先  
後計四百九十六級破十六寨餘諸苗素居化外者  
亦望風納款降其衆一萬三千餘人相其要會置官  
司以控制之凱旋乞歸省母得告卽行行至長壽聞  
喪會潘茂西番寇邊西鄙繹騷 詔特起征之卽墨  
衰而往偕副總兵某相機征勦無何黃草壩暨龍州  
諸寨以次報平其任昌等四十五族不煩兵而下惟  
西坡等處負固寇擾如故進兵撲之破其七寨於是  
潘茂悉定奏功計破虜寨二十二斬首一千七百級

俘獲人畜器械無筭隨處修葺橋棧增築墩堡數十  
廣袤加倍於舊己亥夏告成於上仍請終制於家  
未幾復自家召拜戶部左侍郎懇辭服闋改左副都  
御史命巡撫鳳陽所至植良卹艱撫綏有法無何以  
疾歿年僅五十有五所著詩文有土苴內外集議奏  
東征紀行錄征夷雜記又嘗刊程氏遺書伊洛淵源  
錄今盛行於世

李浩

李浩字德廣德安人正統丁卯貢士拜兵科給事中  
英宗御朝見其儀狀偉甚每欲超遷擢南京工部侍

郎勅總京儲兼理屯政處置咸宜天順改元左遷貴州叅政未幾轉貴州布政使適苗夷爲患拜副都御史往撫治之尋四州大壩夷亂統雲貴兵征勦所向克捷加二品俸卒

周鑑

周鑑字孔明正統乙丑進士選授監察御史出按江西大學士陳循子所爲不法鑑按置大辟還其所奪田廬子女若干陳切齒伺以中之無所得已風部遷雲南按察司副使終陳在政府九年不遷鑑所至汰墨理枉仍開寶泉壩積水溉田多至數萬頃後以通

考過家行江中風覆其舟有周濟者緣木從傍出谷  
舟得鑑尚端立無恙所賁俸金僅二百敝衣數襲貯  
革囊中驛吏自水底鈎以還鑑鑰識如故衆驚以爲  
神尋陞山東按察使乞歸與布政李正芳僉事董應  
軫相友善三人者有雅望縣爲建耆老堂于治右有  
大政及事疑而不決者必咨而後行之

### 陳金

陳金字汝礪應城人祖琳景泰中進士拜南道監察  
御史改知岳池縣撫流亡辯冤獄治儲禦寇以能著  
績擢按察僉事金舉成化壬辰進士知婺源邑人祀



之拜監察御史風采凝重歷擢副都御史巡撫雲南  
勞績茂著進南京戶部右侍郎總制兩廣軍務先是  
都御史韓雍開大藤峽金至值岑猛告變極力區畫  
疏改大藤爲永通邊夷底寧進南京戶部尚書會江  
西桃源盜起詔總七省兵平之進太子少保復總制  
兩廣入掌院事值車駕南征還次通州時宸濠就執  
權璫江彬輩欲混淆功罪金首言濠不軌狀及王守  
仁伍文定勤王之功廷議遂定尋加少保致仕金虛  
直好善剛果有爲志在立功不問家事年八十三卒

劉洪

劉洪字希範安陸州人成化戊戌進士授陽穀知縣徵爲御史陞浙江副使廣東按察使擢右僉都御史巡撫貴州四川尋陞右都御史總督兩廣入掌南京院事守制歸卒於家詔贈刑部尚書賜祭葬洪儀觀脩整性度醇實與人言表裡洞達巡按得憲體在貴州時米魯餘黨煽亂洪劾守臣之邀功開釁者數人乃帥兵討平之在四川松潘夷弗靖洪嚴法令禁奸植良邊人賴之以安兩廣潮惠二府獍賊出沒爲患洪出師俘斬甚衆邊境屹然倚以爲長城云

嚴 禎

嚴禎字廷瑞孝感人成化丁未進士授大理評事擢  
衛輝知府性仁厚有古風爲政平易不尚苛刻衛輝  
不戒於火延燬公署事聞當道欲罪守者禎引爲已  
責全活百餘人去後民祠之孫志迪字子吉正德辛  
巳進士授南評事博雅好文早卒志業未究

鳳翔

饒厚安陸人祖政京出望江成化間以進士授府  
學教授遂家焉鳳翔爲郡諸生事父母竭力逮喪晝  
夜哀寢柩側三年旣葬廬於墓哭奠告面一如生依  
土成丘<sub>嶺</sub>有卑校鳥巢之越六年始歸朔望猶徒步

泣奠雖雨雪不廢不赴宴會服衰麻終身有司以孝行獎

華清

華清字廉夫應城人穎慧博給成化中進士授蘇州府推官以直免歸杜門吟咏自適爲文爾雅尤工於詩兼通字學繪藝士人多傳之所著有西山集

王琰

王琰字廷用孝感人成化甲辰進士授戶部主事員外郎不避權勢戚畹張獲麟挾勢妄殺人琰直之歷擢山西左布政時北虜人寇琰多方運餉頗著勞勛

周憲

周憲安陸人弘治六年進士歷刑部員外郎謫袁州府通判正德改元復其官歷郎中大理府知府拜江西按察副使攻華林賊戰死之其子幹救之戰亦死是日憲以賊食盡會兵三面夾攻憲攻自北門三射輒中賊少却憲與其子先登逼之會賊以牆石滾下如雨軍潰被執憲頭中刀血流滿面左髀中鎗不能行猶大罵賊不絕口賊怒支解之以徇其子幹前救力戰竟墮崖死敗兵先舁其屍回營翌日以單裊裹屍還焉先是制兵者以馬腦華林賊竊發憂之會憲

到卽檄憲擒勦憲首擒廬山左湖盆塘賊百數軍爲之振乃移軍奉新賊恐分立仙女寨以拒我憲拔之賊又立寨雞公嶺憲又拔之先後斬獲以千數於是進壁華林絕其出道塹之而守久之賊窘遣謀者言賊饑餓匍匐狀憲信之遂移檄會兵夾攻然它兵實觀望不進而憲獨與其子進逼之坐是敗而死年五十三善於星命之學初華林之後自言刑殺太重無制將恐不利已而果然

陳軾

陳軾字子敬應城人弘治乙丑進士知臨海縣有治

聲召拜監察御史以抗直不徇時貴出爲山西副使  
歷右副都御史巡撫南畿轉大理卿戶部右侍郎小  
心謹畏臨事精確有體不務矯矯之跡以病卒于官

### 徐珪

徐珪應城人弘治間以掾役刑部時閹宦李廣用事  
其黨楊鵬監東廠羅織朝士輒至死珪手疏數千言  
指斥廣鵬竊柄將不利於國乞革東廠或遣文臣兼  
理之有必斬臣首必行臣言等語詔獄治之竟除籍  
踰年主事陳鳳梧薦授桐鄉丞擢贛州府通判有平  
寇功陞知州致仕歸卒于家

劉槩

劉槩字平甫安陸人正德辛未進士授行人諫阻  
武宗南巡卒于杖下嘉靖初贈監察御史

顏木

顏木字惟喬應山人童丕岐疑弱冠秀發壯而有志  
抗跡前古正德丁丑舉進士居都下與鄉人黃岡王  
廷陳顏頤聲譽然端雅峻潔人恒推重木益自信求  
同於道弗求同於俗乃竟于時禁外補許昌守先教  
後政綱目井井渥於澤下再期政成移亳州亳故有  
武豪石氏狎睚州守莫可誰何木鋤折不避而又貌



視當樞人竟落職以歸怨者將梗於途毫民德之護  
持以行歸益淬礪自信曰彼能尼吾仕而弗能錯吾  
履能黜吾爵而弗能墮吾學吾將樹風立言示範來  
世屹然表正於淮漢之間自號曰淮漢先生首著家  
政以範俗次作州乘又作邑乘作七禮解作選詩評  
作十朝小識作興都志其詩若文則有燼餘稿行於  
世

向光振

向光振字伯羽應山人正德中領鄉薦性嚴謹絕俗  
工爲古文詞奔父喪渡海遇風以身禱母病當應制

不行祖所遺產悉以讓其兄嘉靖中知四川高縣刻  
勵清操多政績當道重之卒於官

### 高翀

高翀字允升安陸人初誕時母夢旭日墮懷中稍長  
能爲七言詩喜讀蔡虛齋書謂爲學不根理道而襲  
陳言是文奴也當沉思入微時座人問難不知所對  
會意而起塗涌百出率常屈其儕偶家故貧不屑依  
人以求濟人亦不敢以濟請嘉靖壬午舉於鄉會試  
落第或謂宜乞學職笑曰乙榜則可乞則不可予平  
生耻說乞字寧甘貧俟爾乙酉北上遇遺金於途執

還以俟其人至還之丙戌成進士授健爲令調溧水  
內外服闋補束鹿召入爲戶部廣西司主事累官至  
貴州巡撫右副都御史其爲政極慮盡忠究於利公  
家而止或目爲愚笑曰愚誠愚乎哉第人臣舍利鈍  
不計則志壹而力專爲此思當吾心不敢以罔公家  
也令三邑不務新條格以奪民便廉刻自奉不改寒  
素鄉人過邑者對食脫粟飯笑曰昔家食時安得有  
此由健爲過家貸于人而後能具裝叅議浙江會入  
賀御史撫毛瑣汚蠚之朝臣盡知其誣且言三操利  
柄不少濡染古心古貌浙之人能悉之謗遂不行久

之擢布政使拜右副都御史巡撫貴州會修三殿巨木皆徵於貴狝祗役三歲乃竣諸苗故伺隙以逞時木政方亟無他餘力苗幸之相煽而起狝曰彼犬豕獨奈何欲窺吾短長昔議西南夷以服屬類從撫彼仇殺或迫於釁則然爾乃今大逆有叛狀倘以木政絀而撫之是貨之與平非撫也撫必不行宜撫其罪薄而弱者取其兇頑者殪之惟以戰爲撫便議上命便宜行事叛卒李昂者擁衆稱雄黠夷酋倚爲援梗雲南貢道狝釋脇從離其黨使間內應乃揚兵臨之昂鼓噪至我兵四合內外夾擊昂乃成擒諸寨皆驚

散滇人謂戡百寨不如除一昂向多鼓煽旣滅乃立保甲籍久旅給產授糧籍以爲兵治貴五年伐木戡夷勢交發而幾微假借民不可使威望才猷無以屈羣策豈能理茲役哉性無飾智驚愚不以利鈍自枉故卒能昭顯邁迹用此道也花馬池邊垣不治狎謂定邊管接舊安邊管約三百里地皆可垣土堅崕峻者其力易惟浮沙飛走處鑿抵原土運客土築之爲力稍難然亦不盈百里拓此則東西千餘里戰守有據河套可復中丞劉是之上其議退居十一年八十卒命諸子曰行已率真心自合理智有所不逮人

將信之有意爲善善是而意非豈能信人又曰樸儉二字吾平生自信處汝輩無改父道喜讀書尤喜爲詩所著有奏疏集玉華詩文稿歸與稿藏於家

傳鳳翔

傳鳳翔字德輝應山人嘉靖癸未進士知上蔡縣拜監察御史歷叅政進僉都御史歷官兵部侍郎協理戎務性豁達才復通敏初築上蔡城區畫不擾民生祠之按江西浙江歷撫甘肅陝西及督餉佐戎所至大著風畧居家孝友處鄉以信義見稱卒贈右副都御史蔭一子賜祭葬

余胤緒

余胤緒字思孝應城人嘉靖癸未進士授南京戶部主事調吏部歷考功司郎中以考察不徇拂當路意免歸起南考功司擢南通政叅議太僕大理卿爲人孝友端方篤志聖賢之學而謙冲脩謹終始不易時望歸之後陞戶部侍郎以註誤免歸卒

何遷

何遷字益之德安人嘉靖辛丑進士歷官刑部右侍郎記問淵博多所超詣喜談性命之學主於圓融應世人不能窺其際爲文章耻剽竊與遠可傳詩有

唐風所著吉陽集數十卷友問四卷

吳翰詞

吳翰詞字子修應山人嘉靖庚戌進士授浙江東陽知縣清約節愛不阿權勢民愛之拜監察御史任事不避艱險按雲南風采卓然當是時分宜勢方燠灼御史復命者歸輒索重賂翰詞不能應遂乞告杜門人罕見其面性耿介方直一介不苟燕居整肅家人亦不敢近歷官十餘年惟舊居數椽比卒歛以緼袍敝屣士林稱之東陽雲南皆祠祀之

補遺



樊士信

樊士信德安府應城人洪武乙丑進士以兵部主事  
守淮河北兵南下士信禦之力不能支遂死之靖難  
後夷其族竟滅去

程春震

程春震字時舉湖廣雲夢縣人成化八年進士由建  
昌知縣選江西道御史十五年巡按宣大廣西以忤  
汪直謫安岳知縣陞順慶府同知馬湖府知府致仕

湖廣黃州府

薛均

薛均蘄水縣人父徵元兩淮水陸都統制從高皇帝渡江叅知幕府督龍華軍事均生時徵夢人授萬鈞於懷中遂名萬鈞高皇帝命更名均少有奇節好讀書見羣兒逐戲輒唾去不顧里中人奇之已而補博士弟子治五經聲名馳著性峻潔清苦而敦孝誼會郡守李公以懷才舉保召赴南畿上十策高皇帝見而驚咤久之將大用而均陳母疾危放歸其明年上辟天下文武廉能之士郡人江勝等復以

均聞因授辦事州同也而除揚州府泰州州同未久  
除知合州 文皇帝詔入爲陝西行太僕寺卿以內  
艱歸哀慟三年如一日凡三詔而均出授均應天府  
尹益尚廉明日飽饘粥茹菜 文皇帝密使人廉之  
偵其日淡粗糲也笑曰人皆樂惟孤與均苦耳然庭  
無廢事應天先是以租稅不收當事皆以罪去均到  
官完事展月卽以完報頃之乞歸 上特進均禮部  
侍郎固留均均拂衣去不顧性不善交多齟齬貴人  
及歸貴人謂均宦深多金也伺其出私發均篋惟冥  
資具貴人莫解也詰之故均曰遺兒孫無它長物

令世業此當有以活矣貴人悵然噤口者久之其清  
苦如此歸剪茅構廬蕭然蓬茨足蔽風日諸當事貴  
人造均均匿不一見也晚號隱林野老吟咏自喜居  
恒念母甚構望雲圖詩若干讀之輒泣數行下云

### 康茂才

康茂才字壽卿蘄州人元季寇亂蘄州陷茂才結義  
旅捍禦立功至都元帥上渡江時茂才力戰立寨  
天寧洲諸將以襄陽大砲破茂才寨茂才奔至京師  
不能脫率兵三千來降上喜得茂才立拜秦淮翼  
水軍元帥守龍灣取馬馱沙克樅陽改屯田使仍兼

帳前總制親兵左副指揮使既破姑孰將窺建康  
上密諭茂才曰友諒且入寇吾欲速其來分其力給  
告以虛實非汝莫可使者對曰家有老閭舊事友諒  
令持書往必信茂才爲書言上不足與有爲兵弱地  
威四面勅敵僕委身圈阱欲奮拔鱗翼倘大將軍分  
道進進便當納款建康可唾手得也友諒得書大喜  
問康公安在曰守江東橋問橋何爲曰木橋遣閹者  
歸書答茂才余某日至橋所呼老康公卽我應內外  
奮擊功成官賞不爾吝茂才以書呈上上曰虜且  
墮散中矣卽命善長日夜易橋鐵石友諒至見鐵石

橋愕然又連呼老康不應遣視管中瘠馬敝旗四散  
落落益大驚曰老賊給我語未畢伏兵四起友諒狼  
狽走得脫擒殺將士數萬茂才從破蘄黃戰鄱陽湖  
圍武昌有功陞副都御史收湖南敗吳巫子門戰尹  
山逼蘇州軍其北門吳平進督府同知從征下齊魯  
開隴鎮河中節制太原諸城再征漢中奉詔還軍中  
以疾卒追封蘄國公謚武毅子鐸洪武三年以茂才  
功封蘄春侯食祿千五百石賜鐵券

### 吳山

吳山字仲安麻城人洪武初舉明經任合州教諭善

千教士擢知內江縣以廉稱尋以憂去補知青城至  
石首卒山博學多聞尤精於春秋鄒來學輩皆出其  
門

戴綸

戴綸字經邦蘄水人英邁方正篤孝友長音律領泚  
武庚午鄉薦任山東道監察御史出按山東風裁凜  
凜與學士解縉交善解撰譜敘親書送之以糾劾  
時貴謫廣西梧州府通判章疏愈激烈再謫庫官尋  
改監倉檄鎖盤糧作木伴歌詞時貴益欲拘繫而中  
以危法第坐之無隙也尋止綸行已歷官清苦自持

而忠憤一節又有足以媿王魏於地下者鄉人至今稱之

劉從政

劉從政字恭明麻城人洪武癸酉鄉舉第一人登甲戌進士拜監察御史蹇諤抗直彈劾不避歷河南山西叅議皆清慎綽著能聲卒于官

吳琳

吳琳字朝陽黃州人應澍之子性純慤力於問學洪武中召爲國子博士歷浙江僉事入爲起居注進至吏部尚書致仕弟琛字文錫任衢州知府



楊節

楊節樊城人洪武末以明經行修授徐州知州政以厚俗爲務郡大疫遣醫治療躬自督視捐俸以給貧者獎拔士類皆翔厲於風教任六年屬邑各上疏留之擢大理知府

蕭昇

蕭昇字彥高黃岡人永樂丙戌進士拜監察御史九載上疏省親文皇帝命給道里費賜勅褒之中允王愷贈之文稱其禮以律身明以折獄皂囊曉進臺閣生風白簡夕森奸回落胆其見重朝署如此

鄒來學

鄒來學字時敏永城人永樂庚子鄉選擢宣德癸丑進士拜戶部主事嘗督軍餉於陝西又奉勅以便宜總理預備倉糧於淮揚等郡還陞員外郎靖遠伯王驥征麓川夷奏請隨行來學督兵當前鋒出奇制勝降附者不可勝計靖遠伯上其功陞郎中內艱服闋陞通政司右叅議俾總督永平山海兵儲正統己巳虜酋犯順京師戒嚴特陞右僉都御史提督永平山海軍務兼撫順天永平二郡至則申嚴號令簡練部伍往來要害之處躬親相度整飭因言承平日久武

備懈弛軍士雖多而精壯者爲權豪所占宜加懲艾  
又言京師四塞之地虜酋敢深入者以有險不守故  
也今宜分遣文武大臣有勇智者選在京士馬分守  
各處關隘振揚聲威首尾相應虜若深入則內外夾  
攻必得其利廷議韙之景泰癸酉陞左副都御史勅  
兼提督居庸紫荆倒馬等關凡所在鎮守等官悉聽  
節制又建議謂畿甸迤西山川固爲險阻而夷坦者  
尚多宜使分闔武臣日加修戢據險而守 上嘉納  
之甲戌秋巡撫蘇松常鎮諸郡上言蘇松之民疲困  
極矣雖寬卹百方饑者目若乞以今年輸京米三十

萬石已徵者悉貸予民來秋聽臣肇畫償官庶國賦  
不虧小民得濟上從其請於是首發倉廩振饑窮勸  
農桑修水利又謂糧莠不薅則嘉穀不遂乃察官吏  
之奸貪與凡大家之暴橫者悉繩以法由是小民咸  
惜其來之晚而奸利豪家且相與飛語以撼之屹不  
爲動行之益堅又建議謂往年蘇松等郡之糧俱軍  
兌輸京頃因邊警調軍征守令民自輸遂至役民十  
五萬加以盤費之資須銀三十萬兩米四十萬石正  
糧數少浮用數多民所以重困也今邊境頗寧軍以  
無事莫若仍令軍運軍用其力民資以財兩適其便

上可其奏未滿任疾卒于官

呂鏞

呂鏞蘄水人宣德丙午舉於鄉授萬安學教諭陞河南宣陽知縣有政績調福建清流縣時縣寇鄧茂七陷清流邑無城廓可恃鏞拒之力不能支具服端坐庭中抗罵不屈遂爲賊解體清流人士哀其忠節於阜城廟祀之

劉訓

劉訓字忠言麻城人正統己未進士知金壇縣有惠政時邑士王豪錢樹俱貧訓爲給俸資遣遊學後二

子俱登第性儉素公暇躬治蔬圃以自給巡撫周忱  
爲僉魚菜戶各一人以供助之擢拜監察御史廉直  
有風裁冢宰王鄴特疏薦其治行爲天下第一尋拜  
山西叅政卒今祀金壇名宦子璫登弘治庚戌進士

### 梅芳

梅芳黃陂人正統間領歲薦性朴實多大節初任福  
建布政理問平寇千餘有軍功居鄉力行古禮鄉人  
冠婚喪祭視以爲法所生五子不易師而教三子登  
科歷政有聲致仕二十餘年非公事不出題其壁曰  
故舊不遺請托勿許里中稱篤行者必曰梅幕云

趙說

趙說麻城人性孝友以詩書教授鄉里父母同日而沒說號慟欲絕者屢負土成墳廬於墓側有二白鵲馴擾人以爲孝感之祥正統間旌表其門

潘文浩

潘文浩黃梅人正統間由監生任廣西灌陽知縣至誠慘怛薄歛省役生平不起非念神明可質治有虎噬人浩爲文禱於城隍越三日虎伏死廟門毛鞞若有笞杖痕嶺獠奸黠素爲民患不可制乃以恩誘其党而術縛之繇是疆場寧謐在任十有五年擢梧州

知府

熊經

熊經字載道麻城人登成化戊戌進士授無錫縣令有惠政諸生邵寶吳學輩皆資給賞拔于塵埃中卒爲名臣時相臣作石檄於太湖欲毀民居開河以通其舟經獨拒之六載以內召去至京遇有中傷之者出知陝西隴州未期以疾乞致仕時年四十九經性剛氣豪風流洒落善談論敦孝友與林士章友士章夫婦同卒遺孤甚幼經以女妻之卒存其孤有東溪集行於世今祀無錫名宦



舒崑山

舒崑山字楚瞻號青丘麻城青丘山人幼奇穎登成  
化甲辰進士授主事員外郎中知建昌府陞廣東叅  
政布政擢副都御史所至有政蹟能文章一時碑碣  
多出其手

李汰

李汰蘄水人字清之性仁厚謹禮度氣質端莊重義  
輕利居常以紫陽家禮爲節持身以敦行孝弟爲先  
少失怙終身哀慕領成化丙午鄉薦任江西永新訓  
導陞義烏教諭歷有敎聲聘福建試事有以黃金私

謁汰辭謁者曰腐儒耳汰謝以詩云義利源頭頗識  
真黃金難換腐儒貧莫言暮夜無知者充塞乾坤有  
鬼神其人慚愧致仕卒門生故舊哀挽迭至著立庵  
稿

王麟

王麟黃梅人親誠孝竭力甘旨不計有無父葬廬  
墓三年經明行脩聞望夙著時目爲王孟子吳顓第  
後梅制科稍滯麟獨下帷憤勵遂領成化辛卯薦以  
開後繼故邑有三十年前無舉子王麟今日破天荒  
之稱所得坊貲悉分給貧瘠及族之不能輸充者大

業未就而卒

華 巒

華巒字伯瞻蘄州人布政使仲賢子蚤負雋才弱冠發解登成化丁未進士選翰林庶吉士性凝重文詞清麗館局多重之授編修尋卒

董 朴

董朴麻城人少魯攻苦誦讀日不能識數行鄰父見而憐之謂其父曰郎君不慧讀書非其質也奈何苦之曷不令牧耶朴聞之憤丐工畫一牧子牧牛置座右益奮勵堅苦力學比長而發慧卒成進士以文學

顯累官大叅中年家居時按楚直指使者朴門人其  
秋當主監臨欲中朴子先時緘書起居朴密封所擬  
秋試經旨寄朴朴發書覽而火之竟不以示子子故  
赤績學負雋材者後科遇別直指監臨亦得中式是  
爲士毅號三泉朴叅江藩時三泉爲舉人家食遣僕  
候朴宦邸朴召至榻前問舉人家居何爲僕對云里  
中比年大侵餓殍塞途舉人日募工瘞殍骼幾千計  
矣朴惻然又問曰舉人故窶甚募工費何能辦曰每  
一殍計工費穀若干斛皆貸于族叔某也朴曰是義  
當爲者因還書勉三泉大略謂凡義所當爲者闇然

行之更勿以示人微有取名意則淺陋甚矣其書尚  
存致政歸林下不肯以片字干公府嘗有鄰翁橫羅  
盜誣爲郡捕而過其門跪泣訴於朴曰公素習我善  
良望活我朴曰汝故知我素不干公府也其人泣而  
去已朴復心憐之召之還曰憶汝昔年新築室余曾  
詩以賀汝尚在否其人曰在曰汝第持此往余不作  
別字也其人執詩以見郡守守覽朴詩卽瞿然曰而  
非良善董公肯以一字假汝耶遂釋之晚歲豫爲室  
兆製挽歌中有平生師魯叟死不憚閻羅之句三泉  
嗣謁選令蜀西充已丑陞蓬州守仕宦才數年許

一青布袍一革靴耳赴任時諸子請曰大人平生志節兒輩能諒一切不敢覬望矣第念大人年高蜀中多美材後事可爲計也三泉曰唯唯旣致政歸諸子迎之水次間請曰往者所請命爲後事計者如何曰吾聞之人云杉不如栢也子曰大人今所具者栢耶筦爾曰吾茲載有栢子在種之可也劉端簡曾師事三泉其清節亦有自乎

### 李文祥

李文祥字天瑞麻城人成化丁未進士孝宗卽位上永保天命䟽觸忌諱謫陝西咸寧丞數月卽召還

擢職方司主事改中書舍人以言事下獄復媒孽成  
狀下司寇議罪文祥毅然誣伏不辭復竄滇南衛經  
歷文祥至立均差法招寨長申罷場禁久而安之按  
察副使吳公檄兼學事都御史鄧廷瓚奉命征南  
苗咨兵畧太奇其才以憲職薦尋以齋表入覲京  
師疏兩上告歸不許卽南還省母大雪中行數百里  
商城曲河水隕陷焉士論惜之

### 周廷徵

周廷徵字公賢弘治己酉舉人除臨淮教諭起復改  
安福徵補山西道監察御史出按陝西時安化王寘

鐸反廷徵斷以先發後聞之義卽調榆林鎮副總兵  
遊時源等兵分布要害仍授楊英以計爲書密達仇  
鉞卒以此擒之并首惡何錦等械送京師 朝廷遣  
都御史楊一清太監張永統兵始至張愧其功不由  
已乃追還寘鐸別自報捷而又盡奪寧夏將士功以  
與諸倖貴紀功給事中郝夔懼而自盡寧夏幾至再  
變賴廷徵威信素孚又爲撫定而白直其功於 朝  
疏內云臣不知他日繼郝夔之死者何人而今日握  
劉瑾之權者尚在郝夔蓋徵以自誓而劉瑾則指永  
也尋陞九江兵備副使會流賊劉六等欲浮江窺南



京廷徵至晝夜籌畫號令一新賊覘知有備遂回掠六合霍州通泰等處而廷徵以勞瘁過當疽發于項卒

劉 璲

劉璲字士約麻城人登弘治庚戌進士授江西豐城縣尹愷悌果斷興學育才邑有淫祀首毀之以正民俗其自守狷介不私一錢以克私橐至徵歛有力民樂辦奸胥巨猾亦不能索一錢也述職爲江右良有司第一卒於京豐人至今思之

曾大有

曾大有字世亨麻城人弘治癸丑進士授知縣徵拜  
監察御史振紀銜憲直聲震于臺端忤逆瑾除名瑾  
敗起擢知府累陟江西布政使

陳言

陳言字萬言黃梅人器度弘雅文學該博成化丁卯  
領鄉薦任泗州學正廸生儒以古行不拘屑文藝及  
尹都昌清勤仁恕四民浹悅疾卒於任如喪考妣追  
慕不已合循吏潘劉楊爲一祠祀之號四公祠至今  
兩地教養模式尤推重於言云

劉天和

劉天和字養和麻城人正德戊辰進士授主事改監察御史出按陝西忤逆瑾被逮謫金壇縣丞瑾敗起湖州知府轉陝西提學副使擢都御史巡撫甘肅訪求趙充國金城舊蹟舉屯政西盡青海裔夷効順以憂歸嘉靖間漕河淤塞起視河道先是都御史盛應期創開昭陽湖靡費罔功天和躬負畚鍤疏汴河自朱仙鎮至沛縣飛雲橋殺其下流又疏泰山七十二泉自鳧尾諸山達南旺湖濬其上流運道遂通進兵部尚書提督三邊值北虜吉囊悉衆入寇天和占象緯襲敗之加少保召入招督團營值俺答阿不孩入

寇以言者論免尋卒謚莊襄

### 邢 寰

邢寰字伯宇黃梅人志行端方才識超絕總角時司衡者試賢哉二大夫論超軼繩尺繇儒士領薦登正德戊辰上第會科道缺人下弭盜議遴補復稱 旨超擢刑科給事中尋轉禮科都給事以犯顏諫諍爲已任 上領之呼曰酸子禁中有爲輒問近侍曰邢酸子得無知乎時欲遠狩寰拜伏五鳳遮阻內竊知之從後載門逸出其爲 毅廟敬憚如此後忤中貴謫廣德州判官調太平郡貳陞南昌知府恤瑾興賢

剔蠹振滯萬口掄頌病卒如喪考妣有過靈視於正  
門行者三學生徒緬德奮義爭執紼發鞠云

石金

石金字南仲黃梅人幼而渾沉長而淳篤爲諸生動  
必循矩正德辛未進士拜監察御史按廣西值土官  
岑猛亂後撫臣姚鏌處治稍乖部落復擾廷議起兵  
部尚書王守仁代之與同心勦平十八寨營立縣治  
值張桂用事臺中諸御史如儲良才輩爭附之變易  
國是金獨立敢言與漢陽戴金風采凝峻時人目之  
曰楚有二金臺中鍾錚居亾何同御史喻希禮上言

時政大要謂帝王無爲而後能有爲無逸而後能享  
逸率作有功當法大舜而以二世爲戒惇大成治當  
法文王而以元帝爲戒疏上俱謫戍久之宥免卒

陳伯安

陳伯安黃陂人賦性方正初任章丘知縣擢拜西臺  
忤逆瑾謫南充尋謫丹陽教諭瑾敗起知靈璧正德  
七年有巨寇楊虎者入寇被虜大罵不屈賊欲刃之  
毅然不避賊驚異遂釋之賊退甕石築城民賴以濟  
建生祠祀之官至山西副使

賈啟

賈啟字啟之黃岡人正德辛未進士授知縣拜監察御史擢光祿少卿尋以事謫徽州推官累遷都御史巡撫延綏啟多材藝慷慨談邊事甚覈歷官所至多治績及致政家居恬約不殊布素鄉人稱爲篤行君子云

劉淑相

劉淑相字養忠麻城人正德甲戌進士授南京兵部主事值武宗南狩叅贊尚書喬宇選一人奉迎諸司皆憚行相獨請往宇壯而許之果得旨還宇始奇其節世宗正統興聖皇太后尚留興邸宇命

淑相往扈蹕夙夜宣力以底乃績尋轉北兵部郎中  
歷陞順天府尹執法秉直權貴多憚之未幾與內閣  
評奏下錦衣獄褫職歸卒于家

王 澄

王澄羅田人天性孝友德量弘雅起農家潛心古學  
領鄉薦十餘年惟教授生徒而已登正德甲戌進士  
國朝羅田甲第自澄始初令番禺有政績徵入歷戶  
部郎中時奏尚衣監太監王某奪良牧署民產地利  
歲省民租役銀一萬二千有奇奉 命督淮餉歲大  
饑捐俸以賑全活甚衆次江西次遼東次壩上通州



俱有賢聲無疾卒于官

蕭一中

蕭一中字執夫正德丁丑進士授知新城縣擢貴州道監察御史疏援馬祿逮繫詔獄貶廣東按察司照磨陞分宜知縣晉東昌府同知南京刑部員外郎郎中復以劾夏良勝大禮疏草再貶饒州通判吏部侍郎霍韜憐其才陞平樂府知府浙江按察司副使河南右叅政江西按察使浙江右布政使轉左布政使卒一中性剛直廉介所在著名譽屢折弗回居鄉亦弗廣置田廬二子俱夭故不能盡傳其功業云

毛鳳韶

毛鳳韶字瑞成麻城人正德辛巳進士授知浦江縣有善政擢監察御史上弭災八事其大者如復舊制以革鎮守此尤關於天下利害之最切者巡按陝西雲南守令以下皆望風解印綬去班列一空尋謫嘉定州判官歷陞推官同知終雲南僉事博學有文名有聚峰文集藏於家子孫至今科貢不乏

張珪

張珪字國信嘉靖癸未進士爲刑部郎中御史馮恩上疏論大臣得失都御史汪鋐大怒欲置之死珪執

不可得從未減遷直隸太平知府值旱蝗珪令捕蝗者給以穀民爭捕之蝗竟息踰年乞歸環堵晏如久之言官薦徵守鎮江維時盜出沒江洋珪以計擒渠魁數人境內始安陞廣西副使坐事左遷吉安同知尋轉工部員外郎中出補廣東巡海副使尋擢廣西右叅政未聞命卒珪性沉毅人不可以私干

劉采

劉采字汝質號安峰麻城人采昆仲咸以文行著時稱河東三鳳嘉靖己丑進士時永康持國秉縉紳附之以采爲會試所拔高等特嚮意采至不肯違衆一

謁補守宿州旣蒞宿益自節約卽一蔬不以厲民而  
能發摘奸伏一日遙望獄中有異狀心動果囚謀逸  
須暮發也鞠之有驗伏辜又民詭愬有人自經死其  
門者不知名氏采視其色有隱遂執按之得其奸抵  
罪屬歲大稔米斗百錢而漕臺督輸急宿民嗷嗷采  
請移帑羨金轉糴爲民代輸俟秋償漕臺意異移文  
格之采竟矯申前議民獲蘇至秋民纒纒輸償卒無  
負者遷戶部員外郎卽中遷四川布政司叅議督理  
黃冊蜀王遺金幣腴甚一無所受晉廣西按察司副  
使粵西夷部錯居有司煩苛以致負固不逞時部使

者議勦采抗議撫使部使者憾其抵已上章刺采賴  
當事者故諳粵西利弊乃不直部使者而賢采晉雲  
南叅政入覲晉廣西按察使旋晉廣東右布政嘉靖  
之季政府得以賄交自信州始采入覲適信州當國  
諸計吏謁相國率薦金幣代羔鴈而采獨否後分宜  
嗣秉政溺賄特甚銓政濁亂以是滯右轄三年不調  
秩滿始轉福建左轄蒞任踰年晉右副都御史巡撫  
山東維時由藩司進巡撫者率致數千金爲政府謝  
采獨無一縑之餽達空函問起居而已尚書趙某者  
分宜私人也借勢螫毒朝士憚如豺虎一歲銜命

視師海上鎮巡以下率踰境趨迎郊勞贈貺金累數  
千計其過東土也采第令候吏持空刺迓之趙手其  
刺恚之諸司聞者惴惴或以告采第發一喙耳巡撫  
山東時民苦採鑛而命下嚴急諸司廩廩不敢違  
迓采上疏請緩詞極婉剴獲允御史某請開膠萊河  
通海運上可其奏因遣視采條其不便者五御史  
不能難事竟寢庚戌虜薄郊圻詔近畿撫臣提卒  
駐臨清諸處扞蔽後歲沿以爲常士卒疲苦采疏罷  
之晉南京兵部右侍考績北上晉戎政國管協理采  
受任自矢曰我無橫草功蒙恩至此卽有急便當以

身殉耳踰年虜患寧復改佐戶部時大司徒以錢刀  
不辦獲譴采攝篆世廟徵發旁午水衡錢告竭采  
疏請裁諸費不經者不報南京鎮武營卒亂司徒黃  
遇害廷議代者采語家衆曰必我昔人畏團營故  
使我今人又畏南戶若阱矣將誰使趣治裝果以采  
往比至條畫度支便宜事凡運艦至計道里遠邇分  
定便庾以省諸餽費戒主計者剔室一切收支蠹孔  
由是轉輸者所在稱便辛酉以災異自劾免丁卯  
穆宗登極起南京工部尚書任改南京吏部尚書尋  
改南京兵部尚書叅贊機務時士紳資適逢世多喜

興事就功而采故任真自如恪守舊章鎮以寧靜往  
時脫巾士懷悃恩威寧戢歛縮毋敢譁者乞休歸三  
年卒年七十四謚端簡祭葬錄廕悉如制

張明道

張明道字希程羅田人嘉靖己丑進士授都察院都  
事歷刑部郎中擢紹興知府陞江西按察司副使明  
道少有大志視世利如敝屣發明晦菴綱目啟迪後  
人有濂洛關閩之風五十始登第清守如故敷歷中  
外政績著聞爲一時循良之冠尋乞休歸滁志稱其  
攻苦食惡尹吳江日民立去思碑於三忠祠同邑萬



傑胡明庶皆出其門

胡明庶

胡明庶羅田人嘉靖乙酉中鄉試第三名壬辰登林  
太欽榜進士觀政通政司卒於官平生孝友篤志力  
學尤精理數嘗取蔡邵皇極律呂二書朝誦夕思章  
分句解或衍爲圖其所自敘又揭中與幾希盡益二  
書之旨書成名曰蔡氏性理二書圖解行于世

胡明通

胡明通羅田人孝友篤學幼育於諸兄事之如父同  
居四十年庭無間言領戊子鄉薦以兄疾不會試者

三兄卒服衰經人以爲過弗恤也撫孤如子中有爭  
產者出已所有平之學宗程朱邑中弟子多師之嘗  
語人曰只此主敬窮理便可詣聖賢域人稱名言授  
知信豐縣值歲飢設法賑之益以常俸有巨賊擁衆  
突至城下通曰城小食寡兵弱備弛何以爲敵親往  
犒以牛酒諭以禍福賊驚曰胡候也遂引去劇盜丘  
永泉負固不服親至巢穴招撫丘遂來庭受約束三  
載考績以士民保留復任三載陞金華府通判甫一  
月聞母墓崩圯嘆曰生不祿養死不表阡吾耻也遂  
致仕家居儉約如寒士里閭咸敬信學者稱東郊先

生所著有征邁集等書兄明庶同舉於鄉以文學齊名著有元溪等集人稱二胡公云

馮天馭

馮天馭字應房蘄州人登嘉靖乙未進士授大理評事改御史巡視太倉轉南畿督學御史杜私謁先行誼置學田以贍貧乏由是風教大振庚子病歸癸卯復補南畿督學申令約束其所拔識多瓌瑋士歷中外顯任以績焯奕所至著聲陟大理寺丞少卿晉都察院右僉都御史協贊院事陞刑部右侍郎改吏部右侍郎及左銓衡進刑部尚書舊例冢宰缺則大

司寇恒代之天馭佐天官久諳習銓事故物論允協  
久之致政歸卒天馭容止旣佳吐辭復雅識者以爲  
有大臣度早從鄒守益學終身篤信其平生孝友恭  
恪雖天植自然而造詣醞藉得之聞見爲多立朝服  
政二十餘年言論風采鬱然有公輔之望

### 范芝

范芝字德和黃岡人性至孝有儒才父嘗病滯三年  
芝侍養寒暑不變未嘗一解襟帶比卒羸瘠骨立殆  
不克喪醫療數年乃起好學洽聞生徒數百多致顯  
位兄姊子貧不立者推產贍給之嘉靖間除知定遠

甄善除惡招撫流亡捐俸備賑邑稱大治竟以母老棄官百姓遮留不得進乃輕服遁歸所著有三秀集

### 奚世亮

奚世亮字明仲黃岡人嘉靖丁未進士授南京戶部主事摧稅以廉著肅清紀法條陳便宜轉郎中改刑部同知延平府時倭夷寇閩或止之世亮曰承平受爵秩臨變而避非忠也單車行日事禦寇移攝興化府倭夷至圍城者踰月世亮與武帥分城而守親冒矢石拒之南城陷亮猶西向迎戰身被數鎗死之一二月寇平始得遺骸於旗亭事聞贈右叅議蔭子諭

蔡完

蔡完黃陂人性孝友重義厚倫自幼甘貧閉戶讀書年二十中嘉靖甲午鄉試歷二十三載未嘗竿牘有司第丙辰進士初任蘭谿令釐弊貞度撫民潔已秋毫不染以賢能徵百姓願留補御史赫然有聲尋卒於京囊無私積僅存匹紵一時同官者莫不哀悼相助有差輒歸不能殯巡撫趙以贖鍰助葬

耿定向

耿定向字在倫黃安人嘉靖丙辰進士少偕友生講

業卽以興起絕學爲已任及登第擢監察御史時冢  
宰吳鵬與分宜比濁亂銓政向抗疏論罷之分宜奪  
氣按關西所薦舉後多爲名卿者行李蕭然或餽以  
石經慮疲役夫卒留之境上作留經記壬戌改督南  
畿學政不以青紫業薄待諸生而誘進以正學構崇  
正書院當其忘言默證灑然一笑不啻曾唯顏喟二  
程之吟弄以歸也有馴行異等者拔之儕伍中檄有  
司禮聘入試至里巷小民仍訓以 聖諭六條而謂  
童子虛明當養以正特敦遣社師以教之以故家誦  
戶弦一時比於鄒魯云生平愛惜人才獎拔善類每

投揭政府錄用之人無知者嘗劾新鄭相褊狹乏大  
臣度新鄭相以此憾向以大理丞謫州判新鄭罷薦  
起累遷至同寺少卿陞都察院右僉都御史丁內艱  
去是時江陵以奪情起復與朝士構與向漸異矣及  
服闋薦用特出向巡撫福建向寓書諷其還諸諫臣  
不能用會向復丁外艱去江陵尋敗臺省交薦補都  
察院協理僉都御史晉左副都尋轉刑部侍郎陞南  
京都察院右都御史申臺規收三撫臣抑新進風聞  
彈事者朝論譴之陞戶部尚書總督倉場八疏乞骸  
予告歸家居七年卒年七十三贈太子少保謚恭簡



晚年力疾答郭方伯書幾萬言大旨謂孔子之立達  
火傳無盡所謂賢于堯舜者此也孟子願學孔子以  
子弟從之孝弟忠信爲勲庸以距詖放淫爲天吏之  
征討以守道待後爲創垂之統業可謂爲巫函不爲  
矢匠而善於擇術者所著有庸言奏疏牘草應迹碩  
輔寶鑑先進遺風數學商求小學新編閨訓禮纂牧  
要編譯異編儒宗傳大事譯學彖觀生紀等書行於  
世學者稱天臺先生

黃 卷

黃卷黃州人初官北部出補山西僉憲晉陝西少叅

已晉憲副卽解紱歸歸年四十五春夏間家衆悉驅  
之田作而獨與其妻操杵曰炊釜作飲食躬荷而饁  
之嘗假農具鄰舍鄰舍子欲昇送之卷曰此何時也  
奈何妨汝務遂自肩之如囚焉性故孤介而嬰情山  
水城邑經歲不一至至則市童撫掌指曰黃公來也  
客至徐起臨庖服饋鼻衣治具具無兼味治畢乃盥  
手更衣出縱談名理因及疆場事奮然有請纓之志  
移日不輟一榻蕭然不啻僧舍造其室接其論若游  
于羲皇之世云

王一鳴

王一鳴字子聲又字伯固號石廩又號叅上黃岡人也幼卽以穎異稱弁而出試督學使者大奇之弱冠舉于鄉登萬曆丙戌進士高第授太湖令不能骯髒以事尊官調臨漳令亾何卒於官生平慷慨多大節其於世味澹如也古今竹素多所閱覽文宗史漢詩不徒規倣杜工部務求抉其精髓每一讀輒批評而封識之如此者凡十讀十批評焉蓋亦一志攻杜氏詩者矣

## 陳文

陳文字簡之麻城人授崇明知縣遇風潮大變奏請

賑濟活三千餘命以擒海賊施珙父子抗言巡按某  
調陝西知延川陞鞏昌府通判督甘肅餉時冢宰王  
瓊謫戍綏德文與之唱和甚歡王起總制三邊益加  
優遇巡撫趙載王堯封巡按陳某以文章政事交薦  
陞戶部主事員外歷俸八年以不附銓司出爲襄府  
左長史文爲人外和內剛以聖賢自期待及門之士  
有躋華要者終身不少假借居官以清介自勵歷任  
幾三十年田廬不改其舊有自怡集存于家

洪祥

洪祥字士高黃梅人德性渾成無疾言遽色事親孝

養備至服勞終身不怠父友璋病癘年餘起卧粥餌  
衣被垢穢必躬治之未嘗解帶一日強坐謂祥曰吾  
病將愈汝姑去就室留一僕扶我足矣士高陽諾而  
陰伏父寢旁夜父欲起溺呼僕不寤力殆而仆忽一  
人叅脇驚曰爾爲誰士高曰兒也知父晝所云者漫  
語特候於此則相持泣曰天乎兒孝至矣吾其痊乎  
已而果痊祥與妻益竭力承歡優游十餘年及父卒  
思慕不置見父形於醺薦鏡中人謂誠孝所感云士  
高喜讀書明義理死生利害了無疑滯壽九十七卒  
號曰隱德先生子六人俱賢

# 史玉明

史玉明廣濟人父早喪事母至孝及母卒玉明傭工自給有山數丈田一畝以父祖墳墓在焉寧受飢寒不肯出鬻構蓬墓側以居有虎過之玉明拜虎低廻而去鄉人曰而急易而居不爾將不免泣曰焉有父祖在此而爲虎所食吾居決不易矣每遇陰雨蛇蝎侵苦塊間玉明視若固有鄉父老或來勸曰汝死後此山此田終屬他人孰若鬻備衣棺以終身母爲自苦也明又泣曰吾寧死於溝壑安忍賣父業以備己之私乎嘉靖初以病卒于墓蓬中僧隣永鑑顏友緣

等懷其糾孝貧甚爲催殯具葬於祖墓東鄉士大夫  
嘉之集衆建亭樹碑以志之其亭曰孝子亭其碑題  
曰孝子墓云

李掾

李掾名學梅麻城人初爲臬司幕掾當世宗賓天  
詔下諸司哭臨時掾伏亭下哭之獨哀督學顏冲宇  
義之因晉署司刑功曹掾兄弟凡四人掾爲嫡且長  
餘孽子掾父暱諸孽而疏薄掾田宅便利者悉與諸  
孽故諸孽富厚而掾獨窘其祖不平欲訟諸官掾跪  
祖膝下泣曰弟吾手足父鍾愛弟卽愛我奈何以腐

屏傷父意，祗乃已。母死，掾廬墓三年，獨棲材莽間，暑雨一蓋，嚴冬一藁，席又苦貧，日拮据生理，出必返，卽深夜必至墓所。一夜至墓，近溪澣，忽雷雨暴作，溪漲不可渡，乃持蓋立溪上，望墓踊號曰：「兒在此！」如是者達旦。又一夜，雪積數尺，許鄰有張姓者，意掾苦雪，或他之，深夜往，矚席藁臥雪中，沒不可辨。環視久之，始見雪中隱隱一髻，高張蓋嗟嘆，轉語諸人：「父死亦廬墓，側如喪母，從事刑曹督臬獄，舊吏督獄者值審囚時，可得若干金，乃掾不以一毫自免，且從家裹糧，餽粥以飼囚之無告者。又有囚法不應死，掾檢牘得其



情請於憲長生之絕口不言恩其人懷百金致私爲  
同曹掾取后察知德由掾也乃置酒飲間更薦幣加  
金爲壽掾色怫然振手去少師里儒張高高師郭慶  
善甫善甫王文成之門弟子也其行誼蓋有本云  
補遺

丁普郎

丁普郎黃州府黃陂人從征友諒有功授行樞密院  
同知復與友諒戰死於鄱陽身被十餘創首脫猶執  
兵若戰狀直立不仆贈柱國上將軍封齊陽郡公從  
祀康山忠臣祠

賈啓

賈啓字啓之湖廣岡縣人正德六年進士由涇縣知縣選河南道御史巡按宣大建言謫徽州府推官陞本府同知累陞右副都御史巡撫延綏致仕

王廷陳

王廷陳字稚欽黃州府黃岡人年甫卅日誦數千言能文章弱冠魁鄉試登正德丁丑進士選翰林庶吉士補吏科給事中武宗南狩與脩撰舒芬庶吉士王應軫上疏阻諫上怒杖之廷謫知裕州以忤監司免歸林居三十餘年日以詩文自娛所著有夢澤集

行于世嘉靖中巡撫顧璘疏薦起用上賜緡帛優待之不果用而卒

喻希禮

喻希禮湖廣麻城人嘉靖二年進士由紹興府推官選福建道御史建言謫戍卒隆慶元年贈光祿少卿